

四庫全書

集部

欽定四庫全書

石倉歷代詩選卷三百三十六

明 曹學佺 編

明詩初集五十六

王澤

字叔潤
天台人

題十八學士圖

晉陽天人赤龍子按劍叱咤風雲起下嫌九土足腥穢
欲將乾坤翻海洗妖蟆射殺落九重日月再啟光瞳瞳

十八文星爛奎壁玉堂高開連紫宮天生奇才真羽翼
南金大珠何足惜鳳凰笙管宴彤庭日聽四海歌太平
圖形更詔丹青手不獨雲臺畫將星君不見嬴家祖龍
坑學士山下看瓜同日死阿房壁土未曾乾草綠宮垣
哭秋鬼

趙松雪八駿圖

趙家王孫擅好書更復畫馬如江都嘗從玉堂罷春直
慣寫天馬隨監奴馬來西苑龍八尺勢或怒驚如鵲立

似疑初浴滎河波身上龍紋五花濕王孫寫駿不寫形
運思已入天機精都將臨池古書法落筆一掃千人驚
今逢此圖乃八疋老我見之惟歎息人間駑駘漫紛紜
天上龍紋誰購得憶昨八駿登瑤池崑崙萬里天西陲
風行電邁景恍惚翠蕤不動天王旗古來八駿雖已矣
房星在天還不死雄姿伏櫪世豈無胡乃惟稱穆天子

寄友人

我本東海人家住東海頭自從卅角時便向西州遊邇

來西遊十九載夜夜思歸夢東海此身厭逐戎馬間落
魄惟存壯心在今年始欲向東還便將歸老天台山相
隨仙人養雞犬笑弄綠水桃花間况聞溪上桃已熟仙
女嬋娟面如玉春風綰結雙綠鬟舞腰解按山鄉曲去
年羣仙遙見招謂予自是王子喬山中何嘗識酒禁日
日爛醉吹璫簫昨日纔經四明道故人相見驚絕倒間
關萬死得生還顏色還同舊時好忽聞天吳落海隅到
海要拾明月珠大風三日撼天黑海底吹折紅珊瑚洪

濤如山老蛟怒白日江皋塞烟霧仙山咫尺不得歸目
送冥冥塞鴻去櫂舟惆悵却西回側望仙山心欲摧空
懷帝子芙蓉闕遙望中天雨玉臺愁來昏昏枕書睡呼
酒狂歌不成醉丈夫出處真可憐往往長遭不如意作
書為謝丹霞仙金堂石室無清緣有心未罷秋來約更
待秋風海月圓

寄泐李潭

寶樹香雲合龍池綠水新涼多今夏雨僧少去年人一

騎留京國雙鴻入塞塵西天幾萬里沙草濶無垠

宋徽宗畫瓶中桂花

玉色官瓶出內家天香誰貯月中花六宮只愛新涼好
不道金風捲翠華

高宗所書絹素杜律

江頭宮殿日遲遲朝退千官默坐時春盡龍沙無雁度
尺鯁惟寫少陵詩

李太白像

春殿龍香試綵毫詩成奪得錦宮袍歸來笑擁如花妓
臥看薔薇月上高

小遊仙曲

中山千日酒初醒知愛玄都夜景清起坐天門吹玉笛
月中珠樹起秋聲

獨步瑤壇歌洞章青天如水月華涼閒將一掬芙蓉露
乞與神龍作雨香

竹枝青鳥

阿母瑤池信不通
茂林松柏老秋風
野池春雨叢篁綠
青鳥猶來認故宮

附朱右

字伯賢
天台人

將歸操

河之深兮誰將厲之
河之淺兮誰將揭之
河洋洋兮不
我濟之竭澤以漁兮
蛟龍辟之覆巢殒胎兮
鳳凰去之
夫人有知兮余寔類之
九州博大兮將余遂之

龜山操

維龜有山造初鴻濛自龜之東淮夷來從膏澤既施草木實多周公上天奈龜山何

拘幽操

美之陰兮累累美之室兮幽幽嗟室之人兮為死為囚匪惟伊慙兮實我之郵日月有明兮容先弗留

履霜操

驅車驅車車行無遲兒在中野父寧不悲驅車驅車車行無遲兒當有母孰使兒飢天生衆民罔不同仁風雨

霜露實活我人民生有知以順陶鈞

殘形操

狸維獸不見其首我夢之形吉凶曷究式協于占載觀其繇曰修爾躬自天之佑

過楊井山

霧盡寒初退風清雨欲晴山田春飽水農舍早趨耕行
李青霄近煙波白髮明正愁泥路滑林外竹雞聲

早起

山樓早起已聞雞雪漏寒光月色低三點有誰憐柳下
四知徒自愧關西街頭燈火催車馬城上風霜急鼓鼙
臨鏡每慚多白髮校書何日對青藜

江上秋懷

水國風高木葉霜滿舟山色入荒涼小孤殘照收江左
大別寒煙銷漢陽新飯軟炊菰米白濁醪香汎菊花黃
故鄉千里空回首雲樹茫茫鬢髮蒼

江夜

江山秋意滿虛舟坐對漁燈看碧流影浸星河天半落
涼生風露雨初收椿庭有月烏啼夜椒園無人鶴怨秋
夢後鄉關徒悵望越吟殘曲強消愁

憶鄉中諸故友

東麓溪頭蟹渚陰故鄉幾度憶同襟詩聯石鼎秋燈冷
韭剪春園夜雨深白髮每馳張長夢青山慵鼓伯牙琴
客牀寥落情無賴月滿空梁強自吟

春懷

舵樓空濶望京華
蘆荻江風岸岸花
山色漸濃昏霧薄
水光遙動夕陽斜
故鄉鴻雁書千里
遠浦牛羊屋數家
邊塞柳營多首宿
石田徒憶舊桑麻

題畫蘭

九畹香清露氣寒
三湘月落淚痕乾
楚天空濶秋無際
誰復行吟澤畔看

方行

字明敏
黃巖人

古意

青松百千尺亭亭蔽浮雲下有螻蛄穴上有烏鵲羣
兔絲附其枝茯苓陰其根盤踞託厚地實維造化神
玄冬霜霰繁積雪埋崑崙萬卉皆凍死此物獨能存
吾將比蟠木坐閱三千春

清麗曲

江花繞瓊闕綠水帶珠樓開宴坐清夜飛觴凌素秋
美人明月珮仙客紫雲裘生世真飄忽應當秉燭遊

懷丁鶴年高士

白雲生虛堂滄江夜來雨念子素抱清守道猶處女離
別月幾圓流光歛如許佳期悵芳歲緬懷在知己

和蒲菴禪師查峰夜夜坐二首

在昔多宿願志藏巖壑間朝看飛鳥出暮逐浮雲還微
雨南澗來涼颼滿空山振衣千仞外逸駕誰能攀

人生固恒理萬化俱同源素抱既不展淹留復何言願
期高世翁談道窮晨昏空林冀有約違已非所論

贈相虛中上人

一室安禪久三生結願頻傳經來帝子送食下天神水
月虛空相山雲自在身慈航如可渡應許姓龐人

過太湖

震澤留遺號行人指太湖封疆連舊壘形勢壓全吳水
落魚龍蟄天寒雁驚呼扁舟思范蠡吾亦老樵蘇

過延陵

延陵懷季子遺跡古城東異代丹青在千年祭祀同高
情思挂劍遠識紀觀風欲問吳封處蒼煙落照中

寄蘇太史

城隅分手地江上斷腸時感此一日舊坐令千里思青
雲當自力白髮不須悲澤國多鴻雁南來好寄詩

留別選禪師

分經蓮漏下幽徑石苔封却笑此時別更于何日逢敲
門思看竹解榻愛聽松明發孤舟去江雲千萬重

題邊文進仙山樓觀圖

仙人散髮懸雙瞳能移崑崙開華嵩為我一掃瀛洲趣

中有千年不死青芙蓉飄飄煙霞入君手深林蔽羃桃
源口蒼煙颯颯驚競飛丹崖恍恍龍驚走赤城掩靄天
姥迴石梁倒掛雙瓊臺桃花半壁鏡中見古木盡化青
猿哀素娥迴颺下瑤殿明星玉女長相見邀余為作商
山歌坐看桑田幾經變丹霞亂飛桂樹表手翳瓊枝拂
瑤草天風吹入西瑤池王母秋眉颯哀老瑤池花暖春
未凋三十六宮散瓊瑤青霓錦帔耀雲日上元月下來
吹簫吹鳳簫兮繫霜絲君亦胡為弄參差他年倘惠金

鷺蘂寄聲蓬島長相思

題吳彥嘉所藏張秋蟾龍圖

張公畫龍人不識筆法遠自僧繇得掛向高堂神鬼驚
恍惚電光來破壁夜當渤海開筆力元氣淋漓浸無極
吞吐日月天地昏摩蕩雲雷太陰黑江翻石轉窈莫窮
雪濤捲空銅柱側洞庭扶桑非爾誰顛倒滄溟為窟宅
乃知前圖只數尺坐令萬里生古色何當置我君山湖
上之高峰聽此老翁吹鐵笛

觀吳孟周司訓真草書譜

古來書學宗史籀竹簡遺文象科斗鍾張真草更入神
片楮至今藏不朽先生下筆絕代無鳴玉綰結青珊瑚
況聞篆隸太倔强百金一字傳東吳墨池浸沒玄兔穎
魑魅反走空堂靜金戟交撐日月輪銀鈎倒畫龍蛇影
歐虞褚薛真出羣精妙只數王右軍英姿老氣欲飛動
懸珠快劍相紛紜嗚呼百世誰復識我今作歌重刻石
莫同繭紙舊蘭亭閔入昭陵永難得

東歸謠送貝仲琚回吳中

天目青逾藍上有危峰橫空插漢高
巉巖滄海深莫測下有六鼇迭負蓬
壺方丈于其側山峻極兮水波瀾千
盤萬折行路難愁看混沌開鑿處尚
有斧跡留人間父山仙翁髮如雪胸
蟠太和吐日月手中鍊石輕女媧五
色曾將補天裂憶聞羽客從之遊青
霞光亂雲錦裘金雞叫海白日慘桂
樹四落空山愁昔年寒月照樽俎明
珠百斛輕于土君山鐵笛悲向人羞
殺堂前柳枝舞君

歸東吳懷故廬明星古宅非吾居會稽泐泐江險誰
探千載太史禹穴之遺書興因東歸發遂作東歸謠他
年相憶五情熱應知淚濕雙龍綃

和馬貫五松小龍歌

五松小姑龍帝女綽綽飛璫夜行雨天吳移海醉不歸
江山千年作誰主漂星輶月流翠滑青霓曳裾玳窗八
同心縷結寄玉郎複疊毼毼製霞襪玉罌轉水月獨漉
綽綽香裊麝蘭屋間擲明珠贈宓妃一片長眉寫新綠

采恩瑤殿罩何年排空鳳管衢九天割鮮不食起鳴絃
水波帖玉無驚煙

送賈彥德訓導霍丘

中都會面得從容兩載同聽長樂鐘天近君門嚴虎豹
地寬人海混魚龍承恩自合歸宣室論道安能在辟雍
江柳春花增別恨白頭何日更相逢

送僧遊浙西

可歎浮雲無定棲錫飛還向浙河西杯從揚子江中渡

詩到生公石上題說法蓮臺花雨墜安禪芝室夜星低
他年元亮如同社相送無勞限虎溪

送殷文學之關中

博士才名成老翁又隨聲教向關中百年禮樂今重見
萬國車書喜會同泰華雲開仙掌出昆明水冷劫灰空
他時太史瞻星地應說奎光聚井東

謝山中惠炭

山木燒餘遠寄將色如玄玉淺含霜光浮上室三冬煖

氣逼寒爐五夜長
吐出葛洪驚滿口
吞來豫讓豈充腸
從今煨芋巖前客
笑指松風石鼎香

陳虛中外史煮石窩

仙人高隱五雲邊
煮石曾令夜不眠
世上已聞殮玉法
山中休種采芝田
丹爐藥與青猿守
瀛海書從白鶴傳
歌罷洞章明月裏
祇應微響落中天

山窗獨坐

日落大江黑
月上萬山靜
獨客坐寒窗
孤雲起前嶺

楊柳詞二首

韶華無限暗中消
搖蕩春光幾萬條
却怪晚來風定後
雪花飛滿赤欄橋

曲江南陌亂垂煙
勾引春風入管絃
惆悵幾株憔悴盡
與人長繫別離船

題美人圖

白玉簾開露氣浮
芙蓉花近紫金鈎
陽春一曲無人識
空拂銀箏下翠樓

復和五松小龍女歌答盧軒

東方龍君降靈女騰颺曳煙軋腥雨撲花掃海神亦悲
玉帝封為九河主貝宮銅龍刺雲滑彤臺鬪玉蛟粧八
瓊絲絡鳳騎紫霞金帖瓏瓏水晶襪黿頭牽波月簌漉
翠幄銀屏沓珠屋倒窳天飄澆火龍九點齊州一時綠
撾鐘勸飲邀萬年花宮盤盤象青天湘妃獻樂鼓冰絃
下窺四海銷氛煙

遊槎峰

北極高臨複道低金銀臺殿與雲齊山中日月開新教
海內文章憶舊題西澗水深龍已化東峰樹老鶴同棲
清遊更擬陪諸老絕壑天風散杖藜

登秦駐山

此地曾經駐蹕來秦皇遺跡尚崔嵬採窮滄海無靈藥
歸到驪山有劫灰萬里黑風迷鬼國一杯弱水隔蓬萊
詩人弔古應多思落日詞丘首重回

閒居

絃管春深繞畫樓微風吹動玉簾鉤倡條冶葉俱無恙
相伴丁香結暮愁

山中絕句

滿溪流水碧于苔無客重登舊釣臺惟有多情沙上鳥
向人飛去又飛來

江南詞

暖氣晴嬌杜若洲沙頭狂客繫蘭舟采蘋多少江南女
搖蕩春光不自由

夜坐

蘭缸滅盡換寒更一枕餘香玉雪清
怪殺無情樓上笛攪人春夢到天明

王景彰

以字行
括蒼人

瑤臺翫月

瑤臺臺上秋月明瑤臺臺下秋水清
道人持杯待月出氣壓泰華吞滄溟
嫦娥靚粧倚東井碾破瑤璃白千頃
興來吸盡金叵羅舞袖裊徊弄清影
裊腸激發問青天

何似當年李謫仙
迢迢雲海望不極
寧知天上今何年
玉階桂花下如霰
瑤光欲墜明星爛
微霜凜凜沾人衣
城上烏啼知夜半

羅槃書屋

羅槃山色連青冥
羅槃花開春滿城
邇來文軌徧南服
構得書屋山之扃
中有牙籤三萬軸
隸古漆書聯汗竹
琬琰新收漢石經
巖序亦開唐白鹿
要將禮樂化殊方
夜深絃誦聲琅琅
已聞文翁教岷蜀
此邦更在岷之陽

岷山之水向南流
織女機絲涵素秋
豈徒風氣開太朴
終看德化齊中州
羅槃書屋世無有
今度有書垂不朽
不是蓮花幕下賓
安得文光貫南斗

劍閣圖

劍閣雲棧高嵯峨
嘉陵江水揚清波
神扃鬼鑿閉幽閭
秋風古道無人過
一朝日華忽西被
宇宙淋漓盪元氣
霆轟飈舉神龍迷
山川草木皆生意
乃知世道有晦明
蜀山萬仞如砥平
聖人在位四海清

題江南秋晚圖

十年不踏錢塘路江上晴煙渺輕素并刀誰剪秋半簾
夕陽正在西陵樹對之便欲發浩歌西風蕭蕭水增波
胥濤已入亂山去木落臺空幽思多

賀西平侯大人平越州

元戎承制掃蠻方踏徧先王舊戰場又見孔明擒孟獲
何殊充國破西羌捷書入奏風雲動凱騎揚塵日月黃
聖主萬年垂大統海山無地不梯航

題畫

聞說蓬萊水已枯
懶從海上拾珊瑚
山前石爛雲生母
天際禽飛雪作姑
三尺清冰雷煥劍
一杯元氣長房壺
此中盡是瓊林侶
何事年來不寄書

題畫扇

二儀開混沌
一氣蘊精靈
石乳通龍井
天風老鶴汀
江山自吳楚
寰宇際滄溟
便欲拋塵俗
尋真向草亭

題畫草木奇峰

蒼虬飛上天鱗鬣墜深麓長風吹不起散作千山綠

題畫馬

天上房星燭地寒故教駿骨落人間如今紙上空形影
苦憶秋風十二閑

石倉歷代詩選卷三百三十六

欽定四庫全書

石倉歷代詩選卷三百三十七

明 曹學佺 編

明詩初集五十七

唐肅

字處敬
會稽人

園隱

所性愜園田
樊生真我師
吾不如老圃
取譏甘仲尼
窈窕白龍岡
四時自成畦
中央據茆堂
可以坐吟詩
有客

忽枉尋華軒駐金羈問我何所樂俛首不答之答之豈
無言吾方抱瓮疲

次張藻仲從軍

殺氣與雲平南征更北征
塞旗朝陷陣飛騎夜追兵
青認烽煙熟紅看戰血生
車連魚腹道舟下石頭城
露布轅門曙鏡歌朔雨晴
還將忠義骨博取鼎彝名

偕朱伯賢王叔潤過愆上人庵分得出字

幽埜接重郭窮冬變陽律
爰從隱者徒過愆禪子室
翩

翩花雨滿冉冉佛香出止水不生瀾空林長見日觀習神
宇澄言忘道機密由來玄度高獨愛支郎逸

會上人臨流亭

長川流疊疊華構鬱翹翹
翬飛涵綠淨洞敞納鮮姦
遙窺衆峰碧仰睇孤雲飄
開簾聞鶯鷺俯檻見游鯈
杜蘅既春敷芰荷復夏饒
以茲悟物理於焉解天弢
微吟既窈窕永歎遂逍遙
何當往濯纓與子願同袍

過漂母墓

昨日下淮河船河流混混不見天逆風一日行十里黃
牛黑驢牽不前今日過韓信城城邊草荒田不耕人傳
韓信此寄跡至今城留韓信名當時乞食向漂母母哀
王孫心獨苦一朝富貴報千金不記淮陰少年侮我來
不弔韓將軍悲歌獨弔漂母墳英雄貧賤少知己不在
男兒在女子

題張孟兼所注謝翱西臺慟哭記後

宮中六更初罷鼓藍田璽玉沈崖浦廬陵忠肝一斗血

去作燕然山下土桐江木落秋日顏有客歌上嚴光臺
石根敲斷鐵如意萬里此魂招不來西風又涸灤河水
故老寥寥知者幾珍重睢陽李葉孫箋簡能裨兩朝史
題趙仲庸所畫滾塵馬

匹馬滾塵誰所寫天水王孫最文雅王孫系宋不系唐
那識唐人與唐馬左輔白沙白於雪四十萬頭名各別
廐中此馬帝長騎一色紫霞名叱撥奚官似隸王毛仲
左手執刷右持鞚沙平草暖不被鞍剪豈飽來筋力縱

翻身倒豎踏鐵蹄霧尾風髻亂不齊元是滇池赤龍種
猶思躍浪湧春泥太平無事征戰少青絲絡頭可終老
不似交河赴敵時夜蹴層冰僵欲倒

題畫

春齋畫坐花落初客來示予古畫圖圖中人物誰所模
衣冠似是兩晉餘中牀獨踞美丈夫烏紗籠髮虬髯鬚
右手摘阮意自如左手控絃分疾徐遶牀六人皆麗姝
纖腰髻結長裙裾一擎羽扇立牀隅一負塵拂髥柄朱

左右二姬意態舒一垂短袂一褰襦一姬手中紙筆俱
濡毫展幅若有需一姬執器製特殊非箭非簫非笙等
紛然列侍艷且都爭妍競巧為王娛當時士尚談清虛
內實多欲不可祛公忠世許王司徒亦有短轅金犢車
還客此圖起長吁恬澹寡欲世豈無

長安古意

長安二月三月時千門萬戶春風吹綺構瑤臺相照耀
香車寶馬並馳驅馳驅照耀皆豪貴九棘三槐夾三市

鼎食鐘鳴將相家朱簾繡柱王侯第王孫公子盛繁華
山珍海錯棄泥沙銀鞍斜度官溝柳丹轂橫移上苑花
花紅柳綠春明媚嬌鳥亂啼花雨細瓊宮錦殿傍雲開
鼉鼓龍簫震天起美人內屋艷神仙鉛華絃轉春爭妍
熒熒珠屏交綵幄隱隱羅幃分玳筵蘭釭桂酒芬芳發
象筯瑤杯光彩徹翠釜金罍不暫停雕盤玉盃分成列
迴瞻複道接飛甍都城佳氣正氤氲雙龍絳闕凌青漢
九鳳紅樓徹紫雲紫雲翠霧碧煙空文窗藻檻何玲瓏

流鶯獨遠昭陽殿芳草深迷長樂宮漢代中興富名將
百戰功成心益壯閒來賭酒聚歡娛意氣相排不相讓
半酣竟上寶釵樓赤欄四面俯皇州一羣粉黛成歌舞
十種風流坐勸酬樓前兩兩鴛鴦度樓下雙雙鳳皇舉
鳴璫背解玉纖輕弄色凝情羞不語就中心事可誰同
平明扶上玉花驄自言百世無衰老自謂千載長英雄
可憐光景留難住秋風一夕生庭樹歌亭寂寞荒草寒
舞榭蕭條殘葉暮昨日紅顏美少年今朝潦倒那能數

將軍舍外無人過
廷尉門前堪崔羅
吁嗟盛時不復作
金莖銅狄隨消磨
君不見廣成山中白雲宿
安期海上顏如玉
軒轅已駕鼎湖雲
漢武終歸茂陵麓
別來倏忽三千年
海水幾度桑田綠

秋江曲

妾家住銀塘
石楠秋葉香
憶君蕩槳去
江水與愁長
西風夜泣
洪花露鴨背
岸低人不度
冷莎如箴刺
煙素鴛鴦飛來
鴻鴈去

和牛士良

咽咽銅虬水
瀏瀏青瑣風
掖斜觀斗轉
簾疎望月空
出門步清影
循階行露叢
睠此光霽景
感予微眇躬
觀國豈非願
懷親方蔚忡

劉松年仙居圖

曾出大茅君
峰頭卧古雲
鳥青呼作使
鶴白養成羣
客較丹砂法
童窺玉券文
近來煙火斷
花氣作爐熏

宿真慶庵

落日古城陰蕭蕭竹樹深
雨花知佛境流水識禪心
月到翻經榻苔緣掛壁琴
不因支許輩那得遂幽尋

登蜀阜寺閣

同登梵閣孤往事問浮圖
山色元來蜀江聲直到吳
風簷鈴半落雨壁畫全無
萬法俱空寂何煩起嘆吁

送王生從軍

羽箭風含鏃雕旗露拂竿
分番知將勇選士屬才難
著為籌邊借碑因紀績
刊少年相贈意別把劍花看

題高彥實所藏桃源圖

衣冠人物總秦餘，千樹桃花護隱居。
不識三章新約法，猶存萬卷未燒書。
水通煙澗纔容棹，草暖晴岡可命車。
不似阿房三百里，重瞳一火便成墟。

菜邁六器銘

鋤

墾而植本，斯立培而厚。蘗斯茂，衡從淺深。毋爾苟。

瓮

泉之容伊德之充泉之吐伊澤之溥其緇勿羸其絮勿墜勿事乎桔槔之機

刃

惡草之滋賴汝之剪夷弗剪弗夷則茅塞其蹊

筐

扱其美母以下體斂其實勿滿而溢虛而受之乃其德左之右之慎爾執

釜

溉于斯烹于斯我有旨畜甘如飴彼鼎食者殆而

盤

脂勿我惡兮羶勿我慕兮惟味道之助兮

題畫

煙舫一翁垂釣霜橋兩客樵琴千重萬重山色十里五
里桑陰

陶穀郵亭圖

紫鳳檀槽綠髮娼玉堂見慣可尋常作歌未必腸能斷

明日聽歌更斷腸

附唐之淳

字愚士肅之子
官至翰林侍讀

會慶堂

飄飄山上雲乃在谷中藏風吹萬里去何當還舊鄉阿
翁昔居鄉黑髮在高堂手栽堂前樹日夕望陰涼不意
偶飄逐雲路浩茫茫阿翁今來歸樹已如人長閭里相
慶賀出入有輝光東畝種菽粟西畝種稻粱南畝種管
麻北畝種桑桑收稻持作飯縹絲持作裳上以輸井稅

下以奉蒸嘗阿翁有兩兒兩兒復有郎螯螯宅中居婉
婉有義方阿翁升堂坐子孫列兩傍阿翁出門去扳輿
相扶將日入始言歸侍婢獻羹湯人生貴慶樂此樂殊
未央傳與翁後人守之慎勿忘

送楊如愚之長沙教授

除目下楓宸江帆掛晚春長沙今夜月大谷去年人太
守分賓席諸生揖路塵莫嫌卑濕地岳麓在湘濱

長安留題

晚閣疎鐘午店雞客途風物賸堪題蒲萄引蔓青緣屋
首蒼垂花紫滿畦雁塔雨痕迷烏篆龍池柳色送鶯啼
前朝冠蓋多黃土翁仲淒涼石馬嘶

石倉歷代詩選卷三百三十七

欽定四庫全書

石倉歷代詩選卷三百三十八

明 曹學佺 編

明詩初集五十八

劉渙

字彥亭
山陰人

登棲雲寺懷原無極上人

尋幽躡危磴步盡得蘭若層雲盪胸起飛瀑當面瀉秋色杖屨外夕照峰巒下寂寂白雲窗不見安禪者

初夏即事

野色滿庭戶
晝涼清景佳
一雙白練帶
飛上石榴花

小遊仙二首

玉京侍宴返瑤池
西母金輿九鳳幃
小隊旌幢三十六
龍聲馬影隔雲飛

綵女香衣結翠纓
瑤笙學弄鳳凰聲
玉樓徹夜無人鎖
十二欄杆月自明

折枝芙蓉

渚宮秋老夕陽多無復君王避暑過席上舞衣零落盡
獨留團錦照蒼波

無題二首

白玉搔頭金步搖春衫紅勝海棠嬌只因記得當年事
重到桃花第四橋

鬢薄鬆鬆綠霧涼春風點額麝香黃背人撲得雙蝴蝶
蒲扇薔薇露水香

附劉績

字孟熙
渙之子也

上之回

上之回神靈祐震金聲播天鼓白旄麾赤熾舉月支拜
跽老上舞宣皇威振虎旅大臣八柱為君輔敷文教沛
澤下雉來越裳熬獻西旅玉燭載調金鏡朗燭篤我懿
親禦彼外侮弭五兵正九扈百穀登民安堵觴九醞獻
萬壽提乾綱結坤紐御金輪運四海

雉子斑

雉子斑雌逐雄雄啄啄雌亦同不能如黃鵠高飛入雲

去時復蔽身淺草中隴頭麥穗長一尺良媒撲朔鼓兩
翼逸羣雋異勇氣張安能矯性從爾食延頸挺臆戛然
雄鳴寧介以死不馴以生

大堤曲

春風起大堤歷亂樓前柳樓頭多女兒解勸襄陽酒襄
陽估客足黃金百千爭買女兒心茱萸帳薄銓光透翡
翠衾重蘭氣深蘭氣未消銓未滅合歡交綰丁香結良
宵一刻惜如金黃金易擲情難歇前船南商去後船北

商來不知妝鏡匣今夕為誰開

獨不見

翩翩五花馬腦絡黃金羈去年三月候送君戎燕支去
時妾別君贈折楊柳枝今春柳枝青遊子無回期褰帷
獨不見默坐顰蛾眉

去婦詞

去婦兩眼泪為君滴平生一滴感妾意再滴感君情三
滴眼欲枯血點淋香纓不滴堂前花死株有時榮不滴

階畔草苦心展芳萌請滴橋下水長煎嗚咽聲

宥婦怨

宥子行天涯行行日云賒詎知閨中婦夙昔減容華憶夫上青山下車逢狹邪路遙不可見拭淚徒怨嗟慎勿令婦嗟宥子蚤還家不應靡蕪草竟作菖蒲花

擬曹子建五遊篇題會兒童氏永壽堂

俯仰隘九州思欲凌風翔詎知蓬萊居宛在東風傍流耀敞閤室倒影籠虛房方扉陰弱木圜樞結搏桑爰有

兩仙人伉儷坐中央被以清霓衣襲以絳霞裳揚眉粲
玉色笑語芝蘭香九天降靈氣萬象藹春陽蟠桃灼其
花珠樹弄其芳初疑鬱宵館復似太微堂金童劇西偏
玉女戲東廂左待白麟脯右挹玄露漿奏以養生篇侑
以却老方永延金石壽天地同其長

寄愚士兄

越國盛文獻多士鬱如林况子崇鋒穎餘聲夙所欽明
闇雖殊資趣舍豈異尋朝遊接經轍夕寢共華衾朱絃

有迭奏綠醕無孤斟鄙情忝葭玉高誼契蘭金合并昔
所懽離索今難任子居曾城阿我阻清湖陰豈無車與
楫川途迴且深仰瞻瑤樹枝還顧蒼山岑顧瞻豈不忍
諒子無遐心眷言懷嘉貺佇立俟徽音

寄內敬

一日八九望每望目屢指秋風漲離憂填塞壯士懷蹋
地地有垠步天天有涯如何與子別三載不一偕狡獪
日日多淳龐日日乖出門非無侶見人心則豺獮為朱

絲繩與君琴瑟諧願為白羽箭藏君金韉韋生結知音
朋死作正直儕長白山崔崔遼水清湔湔人生莫睽離
睽離恨難排

八月十五日夜泛湖

舸艦中流並琴尊上客同林泉真有待洲渚暗相通霧
斷山疑畫烟沈水似空卷帷邀桂月攬佩結荷風纖歌
凝鳳籟醉舞踏龍宮杯深知酒聖詞富識文宗雅會殊
難得高情幸不窮賦詩聊自奏不是倚才雄

送陳指揮出海

命將出嚴城龍驤舊得名氣排山岳重威鎮海波平天
濶金笳迥風高錦颿輕魚鱗耀鎧甲猩血粲旂纓羆虎
獬皆習蛟蚪安不驚懷柔歸聖主訓練集奇兵營控蠻
沙白旗翻島日明遐方勤入貢昭代慎徂征蓐食惟加
勩瓜期待次更懸知凱還日鉦鼓報千程

送沙門繼徹遊京寺

芳蘭不怨秋幽桂不媚春拂拭片月心斗數孤鶴身采

珠須采蠟懷玉休懷珉當思鏡中綠歸濯鞋底塵

題宋院人畫著苔梅

濃露洗花骨苑空勞勞春綠罽疊仙帔粉姿疑笑人畫
屏胃幽夢夜苦香不歇楚竹裂鳳膺恨魄如懸玦

行路難二首

奉君蓬池之鮮鱠郢水玉色之春醪百金螭龍之珥帶
五紋翔鸞之翠袍人生貴賤骨同朽及時為樂意始豪
盛年一去不再返勿令心苦形復勞不見梁王舊池苑

石麟圯壤沒蓬蒿

君不見盆中絲須臾改變朱與綠
男兒重交誼何為中路多反覆
憶昔感君相與深白日青天矢寸心
一言忤意成蒂芥金石之好為消沈
四座且勿歎聽我撫節歌路難空傳
管鮑舊時事古人節槩今人看落落
園中松柏樹幾曾霜雪一摧殘

放歌行

銅駝故國風烟慘譜牒煌煌猶可覽
軍壁焚燒紀信車

諫臺攀折朱雲檻當時圭組盛蟬聯世澤相承五百年
城中甲第連雲起樓上歌鐘鎮日懸人生貴賤如翻手
萬事紛綸無不有國步艱難徒扼腕世情猜忌惟鉗口
亂離家業散無遺環堵蕭然隱在茲門前屢揖經濟士
眼底不挂屠沽兒十載飄零寄他縣懶將衣食看人面
索裏長嗟無酒錢牀頭却喜留詩卷東鄰惡少鬪雞回
白壁黃金滿屋堆也知六博無高手時至君看好采來

王山農畫梅歌二首

玄冥凍律凝陰谷山魃幽幽弔僵木誰卷鮫機一尺烟
鋸刀碎刻藍田玉博羅仙人調小鳳瓦冷霜華不成夢
火熏金獸蘭氣溫鐸窗斜月淡幽痕

其二

水仙騎龍歸海宮玫瑰珠珮迎春風霧澄天淨露嬌影
蔬粉染衣香更濃鮫綃隔夢黎雲色么鳳不鳴花脈脈
畫角吹殘十二樓湖西曉月涵空白

子昂萬竹圖歌

鳳翽刷雲光，矗矗錯刀鉤。
鐔稜曾玉誰觸，江君五十絃。
殘蛾泣露團，秋綠海颺撼。
月聲玲瓏，石烟貼虛幽。
翠重澄凝，商素排九峰。
古潭一夜吟，雌龍。

蓮塘謠

疊翠參差水容淨，蘭芽半吐蒲根冷。
膩極紅蓮怨臉明，霞綃委墜千重影。
藕腸斷處絲暗牽，荷露學珠那得圓。
小姑羅袂拂秋月，鏡裏紅妝只自憐。
吳歛響斷平橋晚，溝水漾愁愁不淺。
搖蕩輕橈泛灩光，銀塘灘灘雙飛遠。

越蛾曲

薄霧壓花春悄悄嬌蛾隔簾香步少綠雲裊娜結雙鬟
金蟲綴額鸞篋闌長眉掃黛濃如山花房惟恨一生閒
蜀紙封緘寄心事淚痕落處紅鉛膩南風吹愁撲天地
桂葉迷濛蕙花死東家燕子飛不歸羅帳曉寒生舞衣
春燕詞

堂前喃喃舊時燕春社一年來一徧雙雙並立語畫梁
主家庭榭足風光側身來往營舊壘拂柳衝花還渡水

落英飛絮太悠揚，却逐春泥入窠壘。
簾鉤乍歇，理毛衣，試力引雛。
高下飛，美人入夜，開春宴，驚遠如嗔。
紅燭輝斗泉廢宅，今無主，苔蘚年年得春雨。

送叔祖吳中省親

車輪遙遙馬蹄速，遠客歸家不停轍。
秋田簇簇禾黍生，繞屋四散牛羊鳴。
今朝靈鵲好言語，行人上堂應拜母。
四鄰八舍具盃盤，日日堂中作歌舞。
兒不遠行母在宅，養蠶種田多粟帛。
却思在外富貴時，何如貧賤不相離。

送王廷桂還姑蘇

王郎入骨愛風雅自言生長姑蘇下一片清冰映玉壺
判知不是栖栖者越王臺畔偏相逢握手高談情頗濃
西陵緩轡吟秋霽北幹銜盃坐日春酒酣擊節因懷古
壯心磊落嗟誰忤却笑將軍類木猴每輕丞相稱倉鼠
郎今身世兩悠悠浪迹翻成汗漫遊誰信魏牟偏戀闕
自憐王粲數登樓故國繁華已凋槁送君只欲傷懷抱
子胥墓下但白楊泰伯祠前空綠草三十男兒宜遠圖

功名富貴等樗蒲只須一舸遊三泖莫作扁舟泛五湖
送周明德應詔之京師

閭門柳條不堪折只宜相見不相別人生蹤跡各東西
半是車輪與馬蹄把酒送君城北路曉日鴉啼烏柏樹
一聲歌罷淚滿巾僮僕催人上塘去願為轆轤纏青絲
轆轤可展心不移男兒出處自有分與君那得不相離
官家有程行莫緩後夜相思月還滿

題宋院人畫盤車圖

大車盤盤牽不住小車碌碌推還去上阪下阪日千迴
不離太行山側路吳鹽蜀米塞滿箱烏犍耳濕筋力强
商人重貨不畏虎飯牛夜夜宿車傍妻孥不須念行旅
橐中有金皆樂土星飡露櫛逐隊行但願利多無所苦
道傍往來多折軸誰人肯戒前車覆

帆山夕照送顧大往遼海

落景石帆秋餘紅掛樹頭斜憎樵笛送遲賴估檣留鴉
落光猶閃蜺遙綵漸收依依映旌旆遠過城西樓

舟中望金山

絕境浮塵遠
穹天積水多
樓臺含蜃氣
鐘鼓動鯨波
岸曉江僧出
沙晴島鶴過
末由窮勝覽
倚櫂發狂歌

送唐生從軍關陝

身逐征西將
休歌行路難
鳴弓霜力勁
舞劍雪稜寒
鄉淚看花落
邊愁縱酒寬
少年曾許國
直擬斬樓蘭

送內敬重戍遼左

別淚不可忍
杯行到手空
風塵重作客
寒暑易成翁
曙

色連關樹秋聲起塞鴻天涯見親友還與故園同

送魏仲房往上高省親

新年思定省理權別家林野雪消不盡春江流正深伯
魚方學禮子賤只彈琴記取臨歧處清言抵贈金

送友歸鄱陽

芳草綠尚淺故園春未殘平生為客慣今日別君難短
棹吳歛曲哀絃楚女彈江花正滿眼且莫下長干

靜軒為陸生作

已於城市遠林徑轉逶迤一鳥不鳴處孤亭獨坐時砌
花閒白日野竹匝清池每欲相來往鄰人恐未知

早春寄京師白虛室先生

帝城佳氣接烟霞草色芊芊紫陌斜霽雪未消雙鳳闕
春風先入五侯家歌鐘暗渡新豐樹遊騎晴驕上苑花
獨有揚雄才思逸應傳麗句滿京華

和毛鼎臣聞白西塘臥病之作

昔年遊宦去鄉閭此日還家勝謫居垂老厭看爐內藥

窮愁還著篋中書青雲有路迢迢隔白髮無情漸漸疎
漢代于今論封禪長卿多病欲何如

贈袁錦衣

少因驍勇調邊城聖主論功特著名心解豹張偏識陣
手揮龍劍祇輕生黑山敵破教傳檄青海軍回看洗兵
今日太平身獨老柳營閒坐聽春鶯

吳越兩山亭

危亭面勢瞰雄都詞客登臨興倍孤地拱會稽開古越

江吞羅刹限全吳黃金謾鑄功臣像紅袖終隳霸國圖
不為千年獨悲愴眼前人事幾樗蒲

題二妹撫嬰圖

休識流黃罷養蠶桃根桃葉並清酣龍綃却暑肌香膩
蟬翼凌風髻影鬋常恨畫中題豈寇誰教窗下種宜男
螽斯合備房中樂見說如今化已覃

阿那瓌

夜雪沒羶城聞笳三兩聲漫山是獵火照著漢家營

結客行

結客千金盡酬恩
一劍存羞為狗盜
伍不傍孟嘗門

征夫詞

征夫語征婦
死生不可知
欲慰泉下魂
但視襦中兒

征婦詞

征婦語征夫
有身當徇國
君為塞下土
妾作山頭石

雙行纏

色絲深文羅
持作雙行纏
繫儂白玉脰
步步作春妍

繡纏合歡帶足底生蓮花自踏君門戶更不由狹斜
為北郭悼亡

獨坐思芳辰鶯花笑冷春自從妝閣閉誰拂鏡臺塵
書扇

家遠綠川長回舟齒菖香緩聲歌白苧明月墮橫塘
詠箏雁

絃絃相近不相離入調頻將玉手移最恨曲終人散後
影分行斷各參差

聞唐愚士除翰林侍讀却寄

看鍊神丹骨已成
新騎雲鶴上蓬瀛
山中舊伴頭將白
遙矚非烟想珮聲

經錢塘故址

潭潭第宅俯長衢
杏閣桐窗似畫圖
三十年來陵谷變
耕人猶識舊銅鋪

畫馬

曾蹴交河度黑山
霜蹄颯颯汗斑斑
如今四海無征戰

老向春風十二閑

李迪畫蘆雁

遠別冰天趁稻梁秋風吹斷不成行夜深獨宿江南渚

夢怯黃蘆葉上霜

附劉師邵

字師邵
績之子

十月十八日出都城途中寫懷

驅車出都門落日臨高城客懷方鬱紆悠悠赴修程四
顧原野茫蕭蕭北風鳴戀闕首重回懷人恨難平豈無

萬言書亦足干聖明上將補衮衣下欲請長纓君子貴
安分苟祿非所榮出處會有時屑屑徒自輕扁舟歸去
來鄉山望中橫濯纓發浩歌滄浪有餘清

鏡湖丹室為周良醫仲方賦

浩浩鏡湖水東流接扶桑矯首望不極三山海中央上
有列仙侶樓居鬱相當若人從之遊鸞鶴叅翺翔授以
養生訣示以金丹方後天可不老壽命週三光稽山孕
靈秀爰茲構丹房鑿雲以為牖結露以為梁左控金虎

伏右提蒼龍驤渴飲駐金波飢食截松肪丹成貯龍鼎
五色爛輝煌鬼神不敢窺禁衛呵不祥服食煉精魄身
輕欲飛揚手握造化樞一舉超八荒我願得此劑持之
獻明堂上以延萬壽下以惠三殤

琴月軒

琴中有真趣不待徽軫全琴中有至音不待宮羽宣憑
軒撫孤桐皓月當空懸秋高夜寥寥萬籟俱寂然掩抑
三四聲志在太古先棲鳳翔高梧潛蛟起重淵高山何

峨峨流水復涓涓相逢盡聾俗孰知妙入玄子期去已
遙牙氏終絕絃此意當自得勿為昧者傳

休理妝

婉婉青樓女秀質淑且明輕雲縈朝日光彩何新鮮云
胡不自貴修飾以為妍競為時世妝皎皎當市纏螭首
耀膏沐蛾眉鬪嬋娟妝成不自見竊為他人憐嘗蒙治
容誨令德何由宣盍思守閨闈永謝朱與鉛

題仙山樓觀圖

宇宙開新域星辰隱上台羣峰羅窈窕列嶂擁崔嵬玉
觀參差聳琳宮次第開珮聲霞外響幢影日邊來王母
迴鸞馭秦娥集鳳臺懸枝珠作網綴地錦為苔樹挽千
峰霧泉轟萬壑雷地疑連閬苑山似接蓬萊真境殊難
遇新詩豈易裁抽毫聊短述深愧謫仙才

游靜海寺

祇園通輦道絳刹聳崔嵬日月瞻天近烟霞接地迴黃
金鋪淨域白玉甃層臺池湧青蓮現窗臨碧樹開塔凌

霄漢起鐘喚海潮回天女將花至龍王獻寶來佛燈澄
霽月僧唄隱春雷香積分廚供醍醐薦茗盃波光搖演
漾林影共徘徊聽法誰能難題詩強自裁雄期過雁宕
勝已壓天台寄謝同游侶何年此重陪

送張孝廉之京

別離知不遠情至亦潸然樹引投京路鷗隨出浦船去
程秋雨裏歸夢曉霜前親舊如相問卑棲似往年

喜陳少尹致仕還賦此奉寄

官滿一身輕，懸車稱野情。
家傳新政譜，壇續舊詩盟。
鳥倦飛還息，鷗馴妥不驚。
翻慚形役者，驅逐尚營營。

贈開元寺隆上人

自向錢塘住，相將廿載餘。
息來諸妄斷，老去萬緣疎。
洗竹通幽徑，褰藤補弊廬。
時時得佳句，還向壁間書。

又

諸方遊欲徧，棲息此山中。
已悟法皆幻，定知身是空。
窗鳴蕉葉雨，簾捲枳花風。
亦是耽閒者，清言喜暫同。

寄王內悅先生時方待詔公車

黿背神山接絳霞
每瞻辰極想京華
祥烟色借宮城柳
湛露香浮御苑花
天樂迥傳雙鳳闕
雲綏遙駐六龍車
明光奏技多如雨
應數王褒頌最佳

夢梅

冰魂雪態自娉婷
夢入東風感使星
春掩殘香烟漠漠
曙分疎影月冥冥
金蟲焰短搖絲慢
珥鴨薰微裊鈿屏
一枕幽情詩思宵
翠禽啁哳喚初醒

畫竹

誰弄參差管聲悲引恨長夜深龍起聽明月滿瀟湘

小畫

雨餘溪樹涼落日水清淺浩歌歸去來心隨楚雲遠

自君之出矣

自君之出矣日日盼征鞍思君如風燭有淚不曾乾

青樓怨

青樓連十里珠箔上銀鈎此中多樂事郎從何處遊

商婦詞

君心若流水妾心如落花風波千萬里相逐徧天涯

宮人斜

粉埋紅艷骨埋香草色非春亦自芳莫道生前恩寵薄
馬嵬塵土更堪傷

四皓奕棋圖

雲霄萬里羨冥鴻曾為儲皇出漢宮數著殘棋猶未了
五陵松柏已秋風

題子陵圖

漢祚中興竟滅新雲臺勲業聳嶙峋英雄盡入丹青手
難貌羊裘把釣人

懷潭講師

青蘿寺裏白頭僧淨業真堪繼祖燈不出山門將十載
壁間長掛一枝藤

石倉歷代詩選卷三百三十八

欽定四庫全書

集部

石倉歷代詩選卷三百

三十九至
四十一

詳校官庶吉士_臣龍廷槐

侍讀_臣孫球覆勘

總校官進士_臣朱 鈐

校對官中書_臣田尹衡

謄錄監生_臣熊敦彝

欽定四庫全書

石倉歷代詩選卷三百三十九

明
曹學佺
編

明詩初集五十九

王誼

字內敬
出唐人

古風

妾家東城隅高門瞰中逵
玲瓏結綺疏參差雕玉題
旭日麗芳藻光風汎羅帷
春花媚妍質徘徊處中閨
調絃

拂纖指哀響流輕颺聲悲節自促曲度雲行遲妍情託
琴瑟中曲正逶迤悵望知音遠華容非故時

其二

中宵苦無寐攝衣起徘徊明月皎素光照我單羅帷良
人久于役山川杳無涯梧桐被秋露密葉凋華滋絃琴
奏鳴商曲度餘音希中含萬古情寂莫當告誰

其三

明月生海底輝光燭重淵豈特照乘車所貴登君筵自

我得此物藏之已多年將持遺所思按劍無由前逝矣
鄒陽子寂莫甘棄捐

其四

太華何嶽崙緣雲陟其巔烏兔前跳躑縱覽周八埏從
峰猶蟻垤萬彙紛濛然掇彼瓊瑤英挹此清泠泉披灑
汗漫襟拂衣起翩躚逝隨長風舉直入通明天

其五

獻玉無良媒漂淪寡歡豫壯齡已非昔馳暉日西驚嘉

木無榮柯修條亦成故一感式微吟吁嗟在中路

其六

崔我會稽山東截海濤碧松柏無冬春千歲淪琥珀中
有煉藥士丹砂固精魄要我與之俱遨遊入無極奮衣
欲遄征浩蕩雲海隔悠悠紫霞想未遂諧宿昔皓首乖
願言臨風起悽惻

關山別意圖

蓮葉未青時沙頭話別離舟行期早發日晏未曾移遲

迴一何久念我平生友莫問去程遙且盡杯中酒君今
往何處萬里長城路路遠人跡稀黃雲黯朝暮隴阪歷
敬傾雙輪不暫停時聞嗚咽水流作斷腸聲驅車無少
息又度長蘆北八月雁南飛天山草俱白橫笛在高樓
關山月裏愁離人聽此曲白盡少年頭

行路難

金鞍寶馬霍家兒驕人意氣揚雙眉生來不省讀文字
但知遊獵誇輕肥白晝呼鷹出平陸暮歸還向娼樓宿

少年隨從多如雨
氣勢憑陵猛於虎
自憐妻妾能管絃
身把黃金賤如土
君不見石崇金谷逞豪奢
珍珠不惜買名娃
一朝身死家仍滅
空使時人留咏嗟

寄陳博士

少小趨庭學詩禮
弱冠求知走湖海
西遊吳楚北燕齊
名著金蘭幾人在
還歸東越臥蓬廬
雪案螢窗志似初
堂中每下高人榻
門外時邀長者車
當年意氣凌牛斗
夜夜龍泉室中吼
青雲有路待馳驅
世上功名期拾取

光陰歲月易蹉跎
北去南來事幾多
驂騑備受鹽車辱
鴻鵠翻遭燕雀訶
李侯顧我非凡調
嗟我滄浪伴漁釣
薦剡聯翩入九重
白首觀光奉明詔
濫職詞林已後時
惟君于我最相知
承恩近在金鑾側
陳力方圖補報私
那知葑菲終淪棄
綠酒紅亭悵分袂
悠悠歸棹向東吳
魏闕回瞻獨流涕
龍鍾自分老江邊
千里鷗波落照前
翻思淶水園中會
詩酒交歡在盛年

秋夜思

北風淒淒寒雁飛明月皎皎穿羅帷空閨思婦不能寐
起望明月臨清池清池隱映高臺側月明正照交河北
錦帳連營夢不同同心自結空相憶相思春復秋月明
應在望鄉樓妾心便是交河水日夜隨君向北流

秋日懷孟熙先生

倏忽成遠別幽棲仍薜蘿草芳經雨歇蟲響入秋多夜
月柯亭市涼風鏡水波相期盡一醉何日更來過

宿鍾山僧房

暫止遊山屐鍾山偶借居已看諸有妄轉覺萬緣疎靜
院蓮花漏閒窗貝葉書三車方待演歸興復何如

九日稽山懷古

山水自如昨古人今復誰雲煙謝家墅松柏禹陵祠聖
代身全老秋天景易悲母將搖落意相對菊花枝

秋夜

獨坐芭蕉院吟詩清夜徂林空松子落蓮盡藕莖枯草
際螢光濕巢邊鶴影孤了然心境澈明月照冰壺

留別翰林諸公

黃金闕下脫朝簪，便理歸舟載綠琴。
竹葉縱教臨別意，葵花難展向陽心。
煙霞谷口耕春雨，松桂巖前憩夕陰。
自愧不才終遠去，故人毋訝玉為音。

奉寄巫總戎

將軍坐嘯靖三邊，鵲印纍纍肘後懸。
玉帳分弓宵射虜，黃沙列卒歲屯田。
元戎昔著條侯令，儒將今誇卻縠賢。
江左野人從白首，要看勲業上凌煙。

寄劉西江

近別西江舊草廬
老來心事復何如
鯨尊自慙狂吟興
鴻寶誰傳秘命書
東洛池臺更異主
武林花竹夢遺墟
十年飄蕩遼川北
不見魚緘問索居

宿虞氏華星軒

愛觀泉石暮歸遲
因共幽人宿翠微
一榻香風紅杏院
半窗斜月綠蘿扉
峰頭夜火明丹竈
澗底春泉沒釣磯
臥向白雲翻自笑
宦途何事履危機

謫居後歸訪錢清陳文達相與酌酒話舊淒然
有感翌日賦此却寄

廿載遼陽悲竄逐感君一見故情多常同幕府談棋坐
曾向轅門倚劍歌越國青山愁裏望清江明月夢中過
南歸重喜開文會其奈蕭蕭鬢雪何

班婕妤

玉簫夜涼新秋蛾暗裏顰如何天上月獨照掌中人

采蓮曲

郎騎紅叱撥妾上木蘭舟不及鴛鴦鳥雙飛共白頭

春思

山映簾櫳水映窗浣紗人在苧羅江年年三月梨花雨
門掩東風燕子雙

畫梅

揚州詩閣掩芳塵萬萼千葩冷照春十里珠簾一聲笛
東風腸斷倚樓人

其二

曾赴孤山處士招水煙寒淡月魂消笛聲喚醒梨雲夢
記得東風倚畫橈

鳳仙花

穠艷何曾妬絳桃瑤池青鳥舊仙曹可憐日暮西風急
滿地爛斑委羽毛

三香圖

微步凌波見襪痕玉容相向總無言夜深髣髴香塵過
疑是揚花姐妹魂

附王懌

字內悅
諡之弟

江南意

郎居橫江口
妾住橫江上
生小慣風波
蓮舟喜搖蕩
蕩舟蓮花灣
花紅照人顏
舉頭見郎來
低頭隱花間
花疎不成隱
相見還相哂
都緣春意深
留連夕陽盡
前浦伴將稀
那能不相違
拋情明月下
各自擢歌歸

白馬篇

金羈塞下兒
白馬明秋練
指顧雄風生
來往如飛電
一

揮邯鄲推三射天山箭單于遠逋逃天子垂恩眷歸來
五陵下戚里酣游宴殺人都市間被酒未央殿青驪換
小妾濃麝熏羅薦狐白擁重裘誰知布衣賤

隔谷歌

兄羈囚弟露宿兄弟本連枝誰令隔山谷兄受飢寒日
困辱弟欲救之力不足力不足可奈何願作高飛鴻銜
之出網羅

臨江王節士歌

節士多壯心悲感雄風起彎弓射天狼欲發無一矢擊
筑起舞髮指冠長空慘慘白日寒海鯨簸浪山嶽動行
者為之愁路難愁路難淚如雨壯心成灰塵悲感留千
古

采蓮曲

吳娃蕩船采蓮子船頭蓮子清如水蘭杜芳洲白露溥
蓼花綠岸秋風起秋風吹髣影悠悠還隨女伴度前洲
誰家夫婿歸來晚何處蓮花獨耐秋秋來春去時難度

錦薦新香漸成故馳暉冉冉近桑榆闕塞蒼蒼但煙霧
關月關山千萬重可悲遙夜不相同歸來獨擁香衾臥
雙淚爛斑一枕紅

碭山偶作

練帷薄暮新涼入虛館蕭蕭雨聲急孤燈照坐不成眠
一夜淒然百憂集公期已促歸計遙坐覺雙鬢生秋飈
會待驂騑開道路豈無羽翼騰雲霄驅馳四牡彭城道
訪古詢今醉煩抱韓信城邊秋草腓條侯塚上煙蕪老

時時回首白雲天一寸丹心日下懸因風寄語淮南桂
為我休吟招隱篇

石城曉

城角曉鳴鳴城西月痕墮城中春思慵楚夢熏蘭火玲
瓏金馬門玉珮聲瑣瑣紅日壓宮垣千花眠貼安

公子行

妖姬蜀國絃罷作南山弄信馬踏芳塵被面春酣重銀
裝赭玉帶金隱袍花縫目送雲間行醉纈拋緋綜

班婕妤

自失傾城寵花顏落舊紅霜飛金屋冷月照錦帷空侍
寢昭陽日休辭玉輦同當知長信妾團扇泣秋風

碧玉詞

碧玉小家女容華早出羣青蛾天上月綠髮鏡中雲舞
袖翻鸞影歌蜃吐麝芬金屏能侍寢含笑解羅裾

送人之京

獨上水邊橈離顏酒半消城頭三鼓近煙際一燈遙海

色將沈月沙痕正落潮未能追逸翽回首跂層霄

李將軍歌

妖芒掃空流電紅將軍飛出麒麟宮
帳士嬌獍噉哮虎義和倒泣煙瀾濛
蓮花古劍腥銅氣射雕健免手中死
赤血淋漓凝冷光塞土千年為君紫

吳城春曉曲

金衣送月吟嬌弄陽雲猶瑣青樓夢
曉風颭戶聲鴉然赭羅射日蘸脂鮮
筵前小玉嚙初月春槽酒滴猩猩血

鳳竹鸞梧聽不絕海塵驚秋尾間竭

瑶琴怨

楚雁驚秋瑶柱澀山雲夜低凝翠濕陽臺曉玉上晴空
銀灣無光露蟾泣松間暗翫吟古龍古淵珠客啼秋風
湘娥淚枯湘竹老江水流寒九山香

春閨曲

翠羅輕袖籠纖春蘭芽茁土香氤氳白馬金鞍向何處
曲欄迴檻流芳塵梨花晚樹飄晴雪朱絃斷盡鸞音絕

簇艸機頭試錦梭
回文漫漬相思血

寄萬德躬

日暮山風吹女蘿
故人舟楫近如何
呂仙祠下寒砧急
帝子閣前秋水多
閩海風塵鳴戍鼓
江湖煙雨暗魚簑
何時醉把黃花酒
聽爾南征長短歌

為人悼亡

鳳入寥天鶴隱琴
月樓清韻杳沈沈
朝雲去感襄王夢
暮雨來愁宋玉心
繡帶墮薌霜蕙老
金蓮銷印露苔深

暗塵棲滿芙蓉帳誰忍重開翡翠衾

驄馬

聯翩蹀躞更趨趨關路風沙舊所諳曾載冠軍天上路
幾乘飛將雪中探臨營臥處霜凝皐倚樹嘶時月映潭
今日三邊烽堠靜却將歸老華山南

雨雪曲

朝來朔雪暗遙天帶雨隨風去復旋態比洛神波上出
聲疑郢客調中傳斜飄綺戶侵帷幙散入瓊樓脆管絃

今日海邊蘇屬國若為辛苦用和羶

折楊柳

佳人向葉斂青蛾奈爾風流意緒多
枝嫋綠煙迷楚驛花含白雪艷吳歌
斜連芳樹遮樓閣曲繞橫塘映綺羅
休伴梅花怨羌笛隴頭征客望鄉多

關山月

漢月孤生瀚海頭迥臨荒野照邊州
光殘金柝聲中曉暈滿雕弓影外秋
塞北征人齊倚劍城南思婦獨登樓

那堪今夜關山曲况有哀笳引淚流

秋夕有懷

洛浦遺衾未可將露蟲凝思滿中堂鵲橋已散銀河影
雁柱初傳玉宇涼燈近暗窗風落燼扇歸秋笥月無光
懷人不寐多惆悵更奈悠悠漏點長

自君出門來二首

自君出門來別思徒耿耿暗鏡照孤鸞何由得見影
自君出門來思君千里遠轆轤繫青絲日夜團團轉

吳宮

香徑無塵水殿空
由來白苧怕秋風
忠臣戮後蛾眉死
麋鹿春遊廢苑中

秦宮

七國爭雄鼎未遷
咸陽宮闕已巍然
樓船不返東溟水
空使蛾眉殉九泉

魏宮

羅綺紛紛委暮塵
野花空鎖鄴宮春
祇餘銅爵臺邊月

曾照當年賣履人

陳宮

玉樹歌殘綺閣塵
景陽無復禁鐘晨
傷心幾樹宮前柳
猶是風流展翠顰

過徐君墓

黃河流水幾清渾
斷碣殘碑尚有文
塚樹不懸當日劍
空留啼鳥向斜曛

歌妓

銀燭前頭見楚蓮
雪香輕袂掌中旋
章華臺上春風起
一片楊花拂玳筵

石倉歷代詩選卷三百三十九